



GOVERNUN KONSTITUSIONÁL IV SEKRETARIA ESTADU KONSELLU MINISTRU

KOMUNIKADU BA IMPRENSA

Soru-mutu konsellu Ministru nian iha loron 13 fulan Abril tinan 2011

Konsellu Ministru hala'o sorumutu iha loron Kuarta ida ne'e, loron 13 fulan Abril tinan 2011, iha sala Sorumutu Konsellu Ministru nian, iha Palásiu Governu, iha Díli no halo aprovasaun ba:

1. Dekretu-Lei ne'ebé aprova Órganika Provedoria Direitu Umanu no Justisa nian

Objetivu órganikan Provedoria Direitu Umanu no Justisa nian atu aseguira implementasaun efetiva kona-ba atribuisaun sira husi ninia servisu no organizmu sira nu'udar ninia papél atu hametin Estadu Direitu nian iha Timor-Leste. Hanonin katak Provedoria Direitu Umanu no Justisa mak sai hanesan responsável atu fó tulun tékniku no administrasaun nian ne'ebé presiza ba implementasaun papél Provedór Direitu Umanu no Justisa, liuliu kona-ba kontrolu atividade administrativa Estadu nian no kbiit atu rekomena komportamentu ba podér públiku sira atu hadi'a hikas fali ilegalidade no injustisa sira.

Regulamentasaun instituisaun independente ida ne'e nian garante ninia kapasidade atu fó konfiansa ba populasaun no ba podér públiku sira liu-husi organizasaun ida ne'ebé efisiente no espesializada iha área sira kona-ba mandatu konstitusionál Provedór Direitu Umanu no Justisa nian.

2. Dekretu Lei ne'ebé forma Komisaun Reguladora ba Arte Marsiál sira

Diploma ida ne'e aprova estatutu Komisaun Reguladora Arte Marsiál sira nian ne'ebé iha funsaun atu halo supervizaun ba atividade husi sentru, klube no eskola sira iha hanorin, aprendizajen no ezersisiu arte marsiál sira.

Hanoin katak iha tinan 2008 halo ona Lei ida (Lei Nº 10/2008, loron 16 fulan Jullu) ne'ebé estabesele enkuadramentu jurídku ba promosaun, hanorin no prátika atividade sira ne'e nian, nune'e prevee regulamentasaun kona-ba estatutu sira Komisaun Reguladora nian, ne'ebé diploma ida ne'e mai realiza daudaun.

Konsellu Ministru halo mós anáize ba:

1. Projetu Idroelétriku Magapu iha Atsabe no Bulobu iha Maliana.

Konsellu Ministru halo análize ba rezultadu husi estudu viabilidade nian kona-ba projetu idroelétriku Magapu no Bulobu, ne'ebé apresenta husi Sekretaria Estadu Política Enerjética liu husi servisu hamutuk ho Ajénsia internasionál *Norplan*, ne'ebé desenvolve estudu ne'e.

Projetu rua ne'e enkuadra iha Programa Governu Konstitusionál IV nian, ne'ebé define katak "líña boot sira kona-ba política enerjética nian ne'ebé Governu ida ne'e iha bazeia liu atu oinsá buka enerjia alternativa renovável sira, atu garante enerjia ne'ebé presiza ba konsumu rai-laran no industria nian, ne'ebé haree mós ba prezervasaun ambiente nian", nune'e halo tuir ona objetivu ida husi objetivu sira ne'eb'e iha: "hamenus dependénsia beibeik ba enerjia, hodi hamenus fluksu importasaun nian, liu husi uza fonte enerjia alternativa renovável sira, hanesan: idroelétrica, biomasa, biogás, enerjia loro-matan, turbina, enerjia sinética husi anin, enerjia kímika ne'ebé armazenada iha vejetál no mikrorganizmu sira, ne'ebé barak loos iha rai ne'e".

2. UNDIL – Universidade de Díli

Universidade Díli hato'o ba Konsellu Ministru rezultadu reforma ne'ebe halo ona hahú husi tomada pose ba Direksaun foun, iha 2010. Reforma estrutural, administrativa, jestaun financeira ba kurrikulu no ba instalasaun sira. Direksaun foun ne'e esklaresa ba Konsellu Ministru kona-ba desenvolvimentu planu aktividade ida, ne'ebe sei preenxe durante tinan lima, rekoñese katak iha servisu barak mak tenke hala'o.

Konsellu Ministru apresia ho pozitivu ba progresu ne'ebe mak hetan tiha ona hodi insentiva Direksaun foun atu kontinua servisu ne'ebe iha tiha ona, ida ne'ebe mak sai nu'udar objetivu komún husi Governu no Direksaun foun UNDIL ne'e atu hodi hala'o di'ak liu formasaun ba sidadaun timoroan sira, hodi kontribui, nune'e, ba desenvolvimento sosial, ekonómiku no kultural iha País.

3. Proposta Lei ne'ebé mak aprova Rejime Tranzitóriu Seguransa Sosial nian

Diploma ida ne'e estabese rejime tranzitóriu ida ba seguransa sosial, fofoun atu hodi garante nesiedade básika ba protesaun sosial trabllador Estadu nian no ba nia familia sira ne'ebé depende ba. Maske sei tranzitóriu, rejime ne'e sei kria rejime seguransa sosial ida iha Timor-Leste no sai nu'udar pasu primeiru ida ba desenvolvimentu sistema universal ida.

Elabora rejime ne'e ho baze ba iha proposta husi Grupu Traballu Interministerial, ne'ebé hetan aprovasaun husi Konsellu Ministru iha Dezembru tinan liubá, ne'ebé determina katak rejime

tranzitóriu ba segunransa sosiál, tuir loloos tenke tuir modelu ho sistema úniku no repartisaun simples.

Diploma ne'e sei asegura ba traballadór Estadu direitu nian ba benefisiu pensaun ferik/katuas, pensaun ba inválidu no pensaun ba sobrevivénsia (bainhira traballadór ne'e mate) ba familia sira ne'ebe depende ba nia.

4. Dekretu-Lei ne'ebé aprova Rejime Jurídiku Administrasaun no Jestaun ba Sistema Ensinu Sekundáriu

Dekretu-Lei ne'e atu regula ensinu sekundáriu jerál no tékniku-vokasionál iha sistema administrasaun no jestaun ida úniku, atu hodi garante nia jestaun ne'ebé integrada iha território tomak, hodi aproveita kooperasaun ne'ebé iha relasaun ba malu, aumenta efisiénsia sistema nian, oferta no flexibilidade alunu sira nian. Diploma ne'e define regra administrasaun no jestaun sistema ensinu sekundáriu nian, hodi adapta ba área sira ne'ebé dook malu husi setór ida ne'e ba sistema edukativu.